

Rétrospective 2005

K' ele soeye longue et roede...**...et k'ele våye disk' å dbout...**

Dji vos kåze di l'anêye 2006, come di djasusse. K' alîz ddja tuzer, vozôtes, godis !!! Mins riwaitans on pô kimint çk' ele a corou, neste anêye.

Beldjike

Les ptits Bedjes ont stî di dnêye po les pôvès djins k' ont pierdou ttafwait tins do radmarêye do 26 di decimbe 2004. Dipus d' 50 miyons d' uroliârds. Gn a des sôdards do Djeneye [du Génie] k' ont stî bouter zels-minmes e Sri Lanca. Proficiâte, mes cousses.

Todi come todi, li vicâreye politike a dné ses margayes et ses herlemes. Li prezidint Vau Cau, ki voeyeut voltî l' walon, a dvou taper l' cote sol hâye. Vo l'rila simpe pålumintî.

Po muchyî les hignes et les hagnes et les poujhaedjes sins les cagnotes des lodjmints sociâs, les syndicats on fwait metinguer les ovrîs, paski l' govienmint tuzéve ås pinsions d' leus efants et leus ptits-efants.

Sâf ki, asteure, cwand on rwaite li vicaedje des djins e l'Afrike u e l' Azeye, i m' avize k' on s' plind d' âjhe. Si on sereut dins on camp d' refudjîs palestinîs à Liban, resseré sins ddja ene cwåte d' idintité dispu kåzu 60 ans, cwè direut on ?

Palestene

Sereut on binâjhe kel gros Sharon a bagué evoye del

Binde di Gaza - ene tere nén pus grande ki nos Redîmés Payis - avou l' idêye di zwerper 40 âcint del Cisjordaneye sins k' les ôtes payis n' trovénxhe a rdire ?

(Note di l'Eplaideu : dispu don, li Sharon a yeu on côp d' sonk, et on n' è kåze pus).

Boûsses

E 2005, les martchîs ås tites [bourses] ont bén gripé, mågré kel petrole montéve eto (a 72 dolâr li bari, on n' aveut måy veyou çoula). Et l' ôr n' a nén lâtchî do griper nerén. D' âbitude cwand l' ôr et l' petrole montnut, les boûsses baxhnut.

El Beldjike, les sins-posse ni dvront pus aler ponter al comene; li dierin côp ci fourit e moes d' decimbe 2005. Mins s' fârè-t i co wârder si cwåte di pontaedje po-z i mete ses condjîs et ses ahotes a kåze d' ene croke u l' ôte [arrêt maladie].

On mousse, voye non voye, eviè l' e-goviername. Les sins-éndjole voeront co do tins.

Terorisse

E 2005, on-z a co voeyou des ewaerantès afwaires e l'Irak (axhoraedjes di totes les cognes), el Djordanreye ey e l' Inglutere (potchaedje di bombes), e Liban (assazinaedje di gaztîs et d' politikîs).

Mins ça a todi stî come ça dispu kel monde est monde. Et les terorisses ont co des belès anêyes divant zels, copurade paski l' mondialijhaedje, ki n' a pont d' ahote, aritchit todi dpus les Ritches et câvele todi dpus li fossé k' i gn a avou les pôves.

Mondialijhaedje

Les pôves ki, cwand les tévés n' elzès vnèt nén raguignî [observer], crevèt todi d' fwin come des moxhes, come e Nidjer. Ça fwait ki totes ces djins la ni tuznut k' a ene sûre: vini e l' Urope u e l' Amerike bijhrece po bouter.

Mins on n' les vont nén. on-z a ptchî d' evoyî les guernâtes [crevettes] pa batea e l'Afrike po-z esse siplitcheyes, et les ramoennner pa camion (et manni l' air avou l' cobroulîye essince) ki d' ascoyî [accueillir] a Ostinde des splitcheus(es) d' Afrike u d' Azeye.

Ça fwait k' on-z a todi on sistinme di handele, la k' les martchandeyes plèt voyaedjî totavå, mins les ovrîs, nén.

Drole di mondialijhaedje !

C' est la kel batch si rtoûne sol sourcea. Les ebagants foû d' Afrike et d' Azeye sont presses a magnî Mouze et les vås po moussî e l' Urope e stoumeligne [clandestin]. Avou ene riguilete di morts, neyîs el Mîtrinne Mer, sitofés dins les camions u dins des contnres k' ont candjî leu foye di voye.

Et l' bastixhaedje di I' Urope ?

L' Espagne vént di dner leus papîs a dipus d' 200.000 clandestins: des Ecwatoryins, des Roumins, des Marokins, des Colombyins. Mins cwand çki les 25 payis d' Urope si metront d' accord po ene seule politike ascoyance des abagants ? E 2006 ?

Asteure k' i sont metou d' accord, come ene seule djin (?!) sol buddjet 2007-2012... mins nén so ene mwaisse-lwè !

2005 dins l' pitite soce des waloneus

Come l' Acsegmnt et l' Cultere ni sont nén co todi a Nameur, cwè vôreuss fé d' grand, hè, ti !

Les soces rotnut todi, et les gazetes ossu, c' est on mirâke. Gn a todi 12 rivowes so les axhletes des waloneus nacionálisses (les localisses, li pus grosse peclye, i n' lihnut kel cene di leu coine).

Les Noveles des Walons Scrijheus d' après l' Bambwès n' ont nén staté avou l' mort da Rodjî Viroux, come c' esteut a rcrinde. Li "Coutcouloudjoû" rexhe asteure tos les troes moes mins il est pus spès.

Li soce des Rçâzeus, k' aveut dhoté [était morte] a Bietris, a raviké a Bive. Les "Scrijheus do Cinte", ont stî priyîs do djâzer do walon pa des soces cultureles do Roman Payis. On-z a eplaidi on "Tintin" avou l' accint d' Nivele...

Li rfondou walon

Ene pougneye di djintis ovrîs fwait tcheryî tecnicmint li rfondou. L' unifyî walon cmince a esse ricnoxhou foû des soces di waloneus... mins on l' eploye todi ossu waire, et nouk ni s' i a metou emey les ancyins waloneus. Cobén ki...

Djôr Sfasi, 23 ans, et k' a skepyî el Roumaneye, a ratourné e walon on gros boket do såmtî [psaltier]. Po on noûwaloneu, on lyi pout dner l' plouma !

L' eciclopedeye Wikipedia rote todi mî, avou cwate cénk bouteus a tinzayeure. Elle a cminci l' anye avou on pô moens di 4000 intrêyes et l' atcheve avou dabôrd 6500. Ça fwait cwandminme càzu 7 intrêyes par djoû. Ci n' est nén ene tchitcheye.

À posse et dins les lives

Mins, e moes d' djanvî 2005, li novea boss di radio VivaCité a fwait tourner on papî come cwè, poy k' on wårdéve ene emission e walon, on n' pleut pus passer des plakes e lingaedje walon foû di ciste emission la. Fât-st araedjî !!!

Gn a yeu deus noveas romans e walon, scrîts pa des vîs rôlis di cisso sûre di belès letes la: li Lucyin Somme et si copleuse Chantal Denis.

Tant k' à Djhan-Pire Dumont, ene des pus capâbès penes do 21inme sieke, li Coirneu d' Hu lyi a rexhou s' live di noveles "Conte di m' payis et d' co pus lon".

Mins, di kåze di margayes divintrinnes emey les Hutwès(ses), li Djhan-Pire a decidé, tot d' on côn, di n' pus rén fé pol walon.

Bén damaedje !!!

Vola ! Dji leye ouve. Dji n' brai nén mins dj' end a gros... mins dji m' rafeye tolminme di meyeus djoûs po onk di nos bénis les pus precieus : li lingaedje di nos djins.

Boune anêye et totès sôres di bouneurs, sapinge k' on n' dit.

Lucyin Mahin, li 31 di decimbe 2005.

Eternâcionå : li wangnaedje do Hamasse

Bouxhe sol tåve

André Gauditiaubois
scrijha li 31 di djanvî 2006 :

Ène bièsse kèstyon:
Asteûr on dminde au Hamas di yèsse djintî sinon on n' lyi pâle pus.

Poukwè n'a t-on né dmindé au Bush di yèsse intèlijant après si-èleckson...

Response di l' eplaideu

Çou k' gn a a rilever : c' est l' prumî côn e l' istwere, dispu kel monde est monde, k' i gn a on vôtaedje pår democratike dins on payis arabe.

Vos voeyoz l' rezultat. Li batch si rtoûnrè dabôrd sol pourcea.

Politike walone : våt mî rire ki braire

Cénk munutes d' actouwalité !

So l' RTW

Nos djocans nos programmes po vos dner cnoxhance des dierinnès noveles.

Gn a on teribe acsidint ki vént d' ariver divant l' Pârlumint walon. On tchôfârd, avou 4 gr di sonk dins si alcol, vént d' fé ene cabolêye di mouzons sol pavêye divant l' Pârlumint walon. D' après les prumirès constatacions, i s' adjireut d' on recidivisse ki, dissu troes ans, a ddja troes moirts so s' tavlea d' tchesse.

Les troes côps, il a stî manborné [réprimandé] på djudje ki l' a leyî e liberté, veyanmint k' ça n' esteut nén onk di s' famile k' aveut stî pokî.

Di ç' côp ci, putete bén k' les tchôzes vont candjî, veu k' il a fwait on on touyisse et k' il a stâré troes pârlumintîs d' on seû côp.

El police dimeure moyale so l' idintité des troes touwés, çou ki leye a pinser k' i gn a surmint on hôt-plaecî dins l' binde, k' a stî ramusté [liquidé]. Nos vos tétrans à courant dins no flach ki vént.

So ç' tins la, à Cir

Troes ptîtes âmes montnut à Cir. Ele n' ont nén co bén yeu l' tins d' comprinde çou ki lzî arrive. I n' a nén co cénk munutes, eles calôdément so l' trotwer padvant l' Pârlumint walon divant kel seyance ni comince.

Sins lzî dmander leu-n avis, vo lzès la padvant l' ouxh di l' infier. C' est l' Diale luminne ki s' disrindje po les vni rascode.

- Foukhîz les bénvouis e l' infier. Divant d' rintrer, dji vos avize ki vos avoz l' droet d' doner on côp d' telephone sol Tere. "

Li telefonaedje da Dârdene

El prumî k' a s' toû, c' est l' Michel Dardenne. I s' dispaïche do telefoner a s' gârçon"

- Em fi, dji so padvant l' ouxh di l' infier. Adon, dji vos vou dire do fé bén atincion a çki vos ndalez fé la padzo po n' vos nén rtrover droci. D' ostant dpus k' el Diale vént di m' dire k' i n' aveut pont d' wilicome ni d' vere di bénvnowe. Dji lyi a bén respondou k' ça n' fijheut rén et k' on boereut bén al botaye. Mins i parexhe k' i n' a pont d' botaye nerén. Et dire ki dji n' sareu ddja pus mori d' soe, poy ki dj' so ddja moirt "

Divant del fé rintrer, el Diale lyi prezinte el facteure " troes munutes, ça vo frè troes meye uros. A vo toû, nosse dame Milquet "

Li houcaedje da Jowele

Mâgré l' pris, Jowele Milket ès dâre so l' telefone. Cwand elle a l' Pâpe, tote tchoupe, ele lyi dmande do vir çou k' i s' passe avou l' Bon Diu pask' i n a seurmint ene

erer et k' ele divreut esse e paradis.

- Èm feye, minme si dji m' lome Benoet saze, dji n' sareu ndaler conte l' avis do Patron, I n' a nén veu d' on boun iy k' vos ndalîxhe à govienmint avou les rodjes. Vos avoz dit k' vos sopoitríz çou k' il advénreut. Ebén sopoitez, asteure.

Ele a co bén cachî do pârler po n' rén dire mins i n' a rén yeu a fé.

- Cénk munutes, ça fwait cénk meye uros, dit-st i l' Diale.

Li toû da Di Rupo

Eyet vla l' toû da Elio Di Rupo.

I comince pa rouscayî dlé l' Diale pask' i n' est nén contin do tot di esse la. Mins l' Diale lyi respond k' c' est di s' fâte, k' il est puni pask' el Bon Diu n' inme nén k' on s' prinde por lu.

Adon, i telephone à prumî scretaire do parti. C' est pus foirt ki lu, i fât k' i dene ses dierins ôres.

- Alo, droci, c' est l' Bon Diu, infin, Elio ki dj' vou dire. Dins kén estat l' parti est i po l' moumint ?

El secretaire lyi fwait on tavlea del situwâcion. I fât bén rconoxhe k' ele n' est nén foirt erlujhante. Pus k' on ranaxhe dins les lodjmints sociâs, pus k' on trove. On va bénrade ès rinde conte ki c' est la k' on-z a muchî les gârçonires des minisses socialisses. On

n'sait pus cwè fé po-z
arester l' herleme.

Après ça, gn a pus nolu ki
vout payî les pâcmetes a
Tchâlerwè paski les liârds
s'è vont. On n'creyrè nén
eyu à telefone, c'est pus
prudint.

On a des rujhes avou
l'govienmint francès a kåze
des socialises k'ont leu
mâjhon d'campagne drola,
et ki les volnut radmint
rvinde divant k'on n'elzî
tcheye dissu l'paltot Les
Francès dijhnut ki ça fwait
tchir, les pris d'l' imobilier.

N'a pus moyén d'fê taire les
ovrîs cominâs ki s'fwaiynut
èn oneur d'awè stî travayî
po rén dilé les gros bounets
do pârti. Mins i gn a nolu po
les croere.

Po fini, vos n'estoz nén co
froed k'i gn a ddja margaye
inte Van Cau eyet les cis
d'Lidje ki vôrént bén prinde
vo plaece. On n'sait pus eyu
dner del tiesse.

Cwand il a-t etindou tot ça et
k'il a tot dné ses ôres, Elio
riclape li coirnet, eyet, tot
aflaxhî, i s'rind seulmint
conte do tins k'il a dmoré à
telephone. El note va esse
salîye.

El Diale lyi dit :

- Po vo comunicâcion, c'est
troes uros.

- Comint, dit-st i Elio, dj'a
dmoré bén pus lontins k'les
ôtes et yeusses, il ont payî
tchir et vilin.

- C'est normâ, respond
l'Diale, di l'infier a l'infier,
ça n'est k'ene
comunicâcion zonâle !

*Christine Tombeur, e moes
d'nôvimbe 2005.*

*Bonne tenue du secteur de
l'habillement belge en 2005*

Li môde bedje e 2005 : nén schovêye evoye pal waclyye chinwesse

C'est minme li contrâve
k'on-z a veyou. So les 8
prumîs moes, les vindaedjes
ont rmonté di 9 âcint. Les
investixhaedjes ont spité à
hot di 27 âcint, crândimint
assez. Les epoortaedjes ont
ogminté d'17 âcint, dabôrd
ki les apoortaedjes ni
crexhent ki di 10 âcint.

Come di djasse, ci n'a nén
stî totès rôzes et totès
viyoles. On s'atindeut a
ene kåkêye d'ovrîs aler a
Rékem, avou li
dismantchaedje di l'accoird
Multifibre al novelan 2005, et
l'waclyye di prodûts chinwès
k'alént enaiwer l'martchî.

On-z aveut veyou clair : les
apoortaedjes di marones po
les omes ont potchî di 1157
âcint (onze côp dpus k'e
2004); les sotént-goidje
chinwès apoirtés el Beldjike
ont rhâssî di 274 âcint (cåzu
troes côp dpus). Onk dins
l'ôte, les Chinwès ont
amoenné 34 âcint
d'mousseures di pus k'e
2004.

Ladsu, gn a yeu on tapaedje
a l'ouxh (mande escuze po
ç'mot la, nén foirt politicmint
comifât) di 4,3 âcint des
ovrîs do cwârtî testile el
Beldjike. Mins - et c'est
clapant ! - dins l'minme tins,
on-z a regadjî des **eployîs**,
ki leu nombe a crexhou
d'1,3 âcint.

Kimint splitchî tos ces chifes la ?

Po cmincî, kénès sociétés
k'on lome li testile bedje ?

C'est totes les oujhens di
mousmints k'ont leu sidje
sociâ el Beldjike. Ele s'ont
ratroplé dizo l'essegne
"Creamoda". Creamoda,
c'est on no bikebok, ki pout
aler el Flande ey el
Walonreye : on n'a nén co
redjonalijhî avår la.

Mins, po dire li veur, end a
brâmint did zeles ki s'ont
ddja displaecî foû payis (e
l'Urope Levantre, e
l'Afrike Bihrece ey... el
Chine).

Mins les chifes po les ovrîs
c'est djasse les cis ki
boutnut el Beldjike. Gn a
17.000 posses dins l'testile
el beldjike, et 40 a 50.000
posses dins des eterprijses
testiles bedjes a l'etrindjir.

Creamoda a mostré ki les
patrons bedje des
mousseures s'avént appresté
dispu bele âdje al waclyye
des prodûts chinwès. Les
eployîs k'ont dmoré el
Beldjike ni sont pus tant des
ptits ovrîs, mins des kådes e
vindince (mårcutigne), des
stilisses et des administreus.

Ça fwait ki les djins di
l'abeymint bedje ont stî
schapés a kåze di leu
sepiance [know-how].

C'est bén po ça k'i gn a co
yeu des novelès plaece
dins les eployîs do testile el
Beldjike e 2005.

Pôreut todi vali k'ça deure !

*Lucyin Mahin, li 10 di fevrî
2005.*

*Istwere***Li Guere del vatche**

Li guere del vatche, c' est come ça k' on-z a lomé ene guere des Walons inte zels, k' a ravaedjî l' Condroz inte 1275 eyet 1278.

Les Lidjwès, Namurwès, Braibonès et Lussimbordjwès i estent egadjis, ki sotnent soeye-t i l' Conte di Nameur, soeye-t l' Prince Eveke di Lidje.

Leus deus estent e margaye a câze d' ene vatche hapêye a Cîne (adon payis d' Lidje) et rtrovêye sol fôre d' Andene (adon Conteye di Nameur).

Do scrotaedje à pindaedje

Al fôre d' Andene, e 1275, Gui d' Dampire, conte di Nameur eyet d' Flande, meta so pî on tournoe.

On lomé Engoran, on payizan d' Djalet, i amoenna li haiteye vatche, hapêye a on lomé Rigåd a Cîne.

Ci-cial esteut eto sol fôre. Si ricnoxha-t i s' biesse, et aler racuzer les hapeus a Djihan d' Haloe, bayî [baillî] do Condroz. Mins come Andene esteut foû di s' triyaedje, ci-cial propôza a Engoran di rmete li vatche la wice k' i l' aveut stî haper et d' end esse cwite; sins cwè i sereut apicî cwand i rmousreut e Condroz. Et, po raler a Djalet, i dveut di tote foice ritrevâtchî l' Condroz.

Engoran fijha come dit; mins a poenne k' i meta ses pîs e Condroz, les omes do bayî ki l'aconcoistent et k' estent a ç' moumint la dins leus

waibes, l' apicî eyet l' pinde après èn åbe.

Li cminçmint des rvindjes

Li signeur di Gône (Djalet esteut sol signeurreye di Gône) s' endè måvla, copurade paski Djhan d' Gône voleut divni bayî do Condroz al plaece di Djhan d' Haloe.

Ça fwait k' nosse Dihian d' Gône adjinçna ene spedicion, avou les signeurs di Cele eyet Spontin, et distrure li tchestea d' Haloe.

Li grande apougnâde

Totossu rade, Djihan di Haloe si rvindja, ey aler bouter l' feu so les teres di Gône. Djihan d' Gône dimanda l' aidance do conte di Nameur, Gui d' Dampire. Come ci-cial aveut spozé Zabele do Lussimbork, les Lussimbordjwès ont moussî, zels eto, dins l' apougnâde.

Les Namurwès et les Lussimbordjwès fjhît l' sidje di Cîne. Les disfindeus del veye fourît tertos broûlés evike dins l' eglijhe. Termetant, li prince eveke di Lidje, Djihan d' Inguî, evoya les Dinantîs ataker Spontin.

Li guere finixha e 1278, après deus ans d' disduts.

Pablo Sarachaga, so Wikipedia

Jean-Baptiste d' Omalius d' Haloy

Djihan-Batisse d' Omaliusse di Haloe, c' esteut on cuzén, al cwatrinme botnire, da Djihan d' Haloe, li bayî do Condroz do tins del guere del vatche.

Il a skepyî e 1783 et a morou 1875.

C' esteut on scincieus, mins il a eto stî governeu del Province di Nameur do tins des Olandès (1815-1830).

C' esteut aprume on fén cnoxheu des rotches. Il a splikî, lu l' prumî, l' adjinçnaedje djeyolodjike del Beldjike, do Bassin d' Paris, des Vôdjes, do Djura, et di sacwantès coines des Apes et des Pirenêyes.

Haloe et les di Haloe

Ci famile la, c' est, e francès les "Halloy", u "d' Halloy", come sîcrît a môde namurwesse, et kécfeye bén eto, sîcrît a môde del Principâté d' Lidje, "Halleux", "Dehalleux", "Dehaleux". I provnèt do hamtea di Haloe (e francès Halloy), metou dins l' ancyin ptit ban d' Braibant.

Po dire li veur, el Moyinâdje, Braibant n' esteut k' on hamtea, adon k' Haloe, c' esteut ene grosse signorreye, avou on tchestra k' egzistéve dedja à 11inme sieke, et k' a stî pår disbrôlé tins del Guere del vatche (1275-1278).

Li tchestra d' Haloy esteut ene des doze dimorances do prince-eveke di Lidje. Li bayî do Condroz, k' i dmoréve, esteut li rprezintant do prince-eveke.

Rilidjon

Les Granmontîs, des moennes k' on loméve les Bons Omes

L' Ôre di Grandmont, c' est èn ôre di moennes ki viként ene miete come des ermites, mins ki dmorént tot l' minme eshonne dins ene pitite cominálté.

Les Granmontîs estént cobén lomés les **Bons Omes**, di càze del grande bonté di leu askepieu, Sint Stiene di Muret.

L' Ôre di Grandmont s' a diswalpé ezès 11inme et 12inme siekes, la kel vicaedje a môde di moenne a rieu brâmint do succès emey les djonnees des ritches ki nd avént leu sô di viker à mitan des ritchesses. Di ces trevénns la, des moennes k' i gn a, come les **Tchåtroûs**, alént dmorer tot seus e fén fond des bwès come les ermites des prumîs tins del crustinnté.

Les Granmontîs, zels, ont cwerou ene mitan-voye : viker à mitan des bwès, mins e cminálté : magnî eshonne et s' ripoizer dins on dortwer, ossu bén po les frés moennes ki les cviers.

Sikepiaedje di l' ôre

L' askepieu d' l' Ôre di Grandmont, ci fourit **sint Stiene di Muret**.

Il aveut stî enondé tot lijhant dins l' Evandjile li spoûle do ritche djonne ome, ki Djezus-Cri lyi aveut dit :

"Si vos vloz esse li meyeu des omes, alez è, vindoz çou ki vos avoz, dinez ça ås pôvès djins et vos åroz on trezôr e cir. Et poy, vinoz et s' mi shure!"

À cminçmint, li Stiene a viké come èn ermite dins l' Bwès d' Muret e Limouzin (Sud-Ouwess del France). Adonpwis, gn a yeu sacwantès djins k' ont stî assaetcheyes pa si egzimpe, et ki l' ont stî rtrover.

Estiene passéve sovint s' tins a scoler ses shuveus. Insi, gn è cminça a aveur ene pitite cominálté ki vikéve åtoû d' lu.

Come c' esteut on prumî mwaisse, i divna cnoxhou long et lâdjé, et gn ourit brâmint des djins a lyi rinde vizite et vni a scole adlé lu.

On vout k' après s' moirt, gn ava ene peclêye di mirâkes a Grandmont, çou ki recfoirta l' idêye ki Stiene esteut on sint ome.

Cwand sint Stiene mora, li 8 di fevrî 1124, ses dissipes fourît tchessîs evoye do Bwès d' Muret pa les Benedictins d' Ambazac. Ces-la avént dné l' djouwixhance del plaece a sint Stiene po s' veye durante, mins i n' ont nén vlou continouwer avou ses shuveus.

Ça fwait kel kiminálté s' a dvou astaler 16 km pus à Nôr, so on platea d' granite, en ene plaece lomême "Grandmont", sol pârotche di Sint-Silvesse.

C' est a Grandmont minme ki l' Ôre a stî amonté, c' est po ça k' on l' a lomé insi.

Li rwè d' Inglutere, Hinri II Plantagenêt, adon mwaisse do Limouzin pa s' mariaedje avou Aliénor d' Akitinne, a dné brâmint des cwârs al cominálté d' Grandmont.

Avou ces dnêyes la, les moennes bastixhît on priyuré ki si eglîhe fourit consacrêye e 1166.

Li régue di Grandmont

Li régue di l' Ôre di Grandmont comprind 65 ârtikes. Elle a stî scrîte aviè 1140-1150 pa Estiene de Liciac, li 4inme priyeu, e shuvant les scolaedjes da sint Stiene di Muret.

Les Granmontîs dvént viker dins l' disseulance, en ene retrôclaye plaece [endroit isolé]. Les rlidjeus divént djuner [jeûner] et i n' plént nén câzer.

I n' avént nén l' droet do coûtiver l' tere, ni do tni des biesses. I n' polént nén nerén aler bouter dins ene pârotche, mins s' polént i rascoyî des pôves dins leu Mâjhon.

L' ôre di Grandmont compurdeut des frés layikes, les **cviers**, po fé les ovraedjes di tos les djoûs, et des frés rlidjeus, les **clers**, ki n' fijhent ki d' priyî. Mins il estént metous tertos sol minme pî.

On "dispinseu" esteut tchoezi emey les cviers po moenner tchaeke Mâjhon. Mins ci sistinme la aléve amoenner sacwantès margayes inte les clers et les cviers.

Gn aveut k' on seu priyeu po regluminter tot l' Ôre al Mwaisse Mâjhon d' Grandmont. Eto, i fjheut fén málâjhey do manaedjî les béns del cominálté.

Portant, l' Ôre end aveut dandjî po viker.

Li Régue di l' Ôre a stî aveureye på Pâpe Adriyin IV li 25 di måss 1156.

Estiene di Muret fourit canonijhî e 1189 pa l' Pâpe Clemint III. Li ceremoneye si fjha-st a Grandmont, li 30 d' awousse 1189.

Li crexhance di l' Ôre

Les rwès d' France et d' Inglutere ont bén aspalé l' Ôre di Grandmont po l' fé crexhe e France. Al fén do 13inme sieke, gn aveut sol payis pus di 160 mâjhons avou 1200 rlidjeus.

Cwand l' Ôre di Grandmont s' a yeu spårdou totavå, il a cmincî a rçure des dnêyes tos costés: des rintes, des démes [dîmes], des teres.

E 1216, les Mâjhons ont stî plaeceyes dizo l' otorité d' on "Coridjeu" tchoezi dins les clers. Mins les cviers n' estent nén d'acoird.

Dins on papî di 1317, li Pâpe Djihan XXII rashonna les pus ptites des mâjhons e 39 priyurés. Adon, li priyuré d' Grandmont divna ene abeye, ki dmana li mwaisse placee di l' Ôre.

Li discrexhance di l' Ôre

Ezès 14inme et 15inme sieke, l' Ôre di Grandmont va discrexhe, a kåze del Guere di Cint-z Ans e des Gueres di Rlidjon.

E 17inme sieke, li Pâpe Leyon X aveut fwait on Concordat avou li Rwè d' France. Ci-cial aveut l' droet do lomer lu-minme

les abés (mwaisse d' ene abeye) et les priyeus (mwaisse d' on priyuré).

Ci djin la, lomêye på rwè, n' estent nén l' tchîf spirituwel des rlidjeus, mins ele toutchive ene pârt des rivnous.

Les rivnous d' ene abeye u d' on priyuré provnent do payaedje des messes ki les moennes dijhent po les djins.

Ci sistinme la, c' esteut come ene taeye [*impôt*] so les rintrêyes des ôres monastiques, k' aléve dins l' potche do rwè.

Li likidaedje di l' Ôre

C' est l' årtchiveke di Toulouse et l' eveke di Limoges k' ont stî tcherdjîs do likider l' Ôre di Grandmont.

Li likidaedje di l' Ôre a stî prononcî li 6 d' awousse 1772 på Pâpe Clemint XVI, ki s' ployive insi ås ôres del Coû d' France. Li decidaedje n' a stî aveuri pa Louwis XVI k' e moes d' may 1784, a kåze kel pålumint d' Paris aveut metou des pires el roye.

Mâgré kel dierin abé d' Grandmont, a tot sayî po schaper l' Ôre, l' abeye a stî serêye cwand il a morou, li 11 d' avri 1787.

Les dierins Grandmontins ont cwité l' abeye e moes d' djulete 1788.

Les bastimints d' l' abeye ont stî distrûts al Revolucion francesse. L' Ôre di Grandmont aveut morou di s' bele moirt.

Jean-Pol Grandmont, e moes d' fevrî 2005.

Médyince

Do novea siconte do magnant må ?

Ene ekipe di cacheus francès vént d' eplaidî on trova ki pôreut bén vni a pont po médyî les magnants mås [cancer].

C' est des linfocites T moudreus foirt hagnants po les celures des magnants mås, k' il ont batijhî IKDC ("Intense Killer Developping Cells", Diswalpantès Celures Foirt Moudreuses).

Les linfocites T moudreus [*lymphocytes T tueurs*], c' est des celures ki fjhèt come les bernatîs des grands dishaladjes [*éboueurs des encombrants ménagers*]. Li linfocite moudreu cwirt après les celures nén trop catolikes ki trinnèt dins l' coir, inte di zeles les cines epestiferêyes pal virûsse do SIDA, u les celures cancerixheuses, eyet les golafer pår [*phagocyter entièrement*].

Li trova a stî eplaidî el sincieuse rivowe inglesse *Nature*.

Si vos avoz l' cancer, et ki vos les vloz mete dins l' siringue ki vs fwait vos pikeures, i fârè co ratinde 10 ans.

Ca les IKDC, c' est des celures di soris. Gn a co ene hapêye po Izès poleur adapter al médyince des djins, si ça rote, todi.

Dj' espere k' on frè minti li spot « rafiya måy n' as »

Li prumî d' fevrî 2006

Rilomés Bedjes

Émile Vandervelde

Emile Vandervelde a skepyî a Izele-dilé-Brusеле (*Ixelles*) e 1866, et-z ï dhoter e 1938. C' esteut on politikî socialisse bedje, mwints côps pârlumintî, minisse, eyet cnoxhou pol "**Iwè Vandervelde**" fwaite po lûter siconte del sôlrêye.

Vicâreye

Si pa esteut djudje di pâye a Izele. Il a stî aclevé amon les bordjoes, mins çoula n' l' espaitcha nén d' lére les tuzaedjes da Proudhon, Benoît Malon et co da Charles Fourier. Adon, il a bén veyou k' i gn aveut nén k' lu ki boléve divant l' indjustice et l' Mizere ki l' industriyalijhaedje capitalisse del fén do dijhnouvinme sieke aveut-st amoenné.

I studia brämint. Si dvént i docteur e droet, docteur e synces sociâles et co docteur en economeye politike. Come djonne avocât, i studia co, po s' plaijhi, li fiziolodjeye, l' imbriyolodjeye eyet co l' sikiatreye.

E 1894, adon k' il est 21 ans vi, i va dner cours di sociolodjeye economike a l' Institut des Hôtels Studies del nouve univiersité d' Brusèle.

Ses scrijhaedjes d' adon sayént d' raloyî l' biyolodjeye avou l' sociolodjeye. Avou on rlomé botanisse, il eplaidront ambedeus on studiaedje lomé "Parasitisme organique et parasitisme social" eyet èn ôte live avou l' tite

"L'évolution régressive en biologie et en sociologie".

E 1918, c' est lu ki rçurè l' pirlodje d' istwere des doctrenes sociâles di l' ULB.

Mimile Vandervelde et l' POB

Cwand il a yeu léjhous les lives sol socialisse, i s' a dit dins lu-minme: "les tuzaedjes, c' est bén, mins sins faitindjes, c' est rén; li ci kel dit, k' el fwaiye !" Et c' est po çoula k' i s' egadja-st e l' politike.

I mousrè à **Pârti Ovrî Bedje** (POB) ossu rade ki ci-ci s' a metou so pî, e 1884 . Nosse Mimile aveut adon 19 ans ey il esteut ddja soçon del "Ligue ovrire d' Izele".

Li prumî programe do POB a stî scrít à congrès d' Cwargnon e 1893. Emile Vandervelde fourit po brämint dins ç' tecse la, eyet c' est lu ki scrijha li Tchâte di Cwargnon.

Emile Vandervelde fourit prezidint do POB inte 1933 et 1938; dj' ô bén, dispoy ki l' fonccion di prezidint a stî metowe so pî, et disk' a s' moirt.

So ces vint anêyes la, les socialisses bedjes vont bouter fer po fé passer les candjmints k' il avént hâyné dins leu programe:

- li vòtaedje à sufraedje univiersel po les omes;
- li liberté sindicale;
- li djournêye di 8 eures;
- les pinsions et l' assurance tchômaedje;
- li Iwè siconte del sôlrêye (Iwè Vandervelde).

Li Lwè Vandervelde

Li Lwè Vandervelde, c' est ene Iwè sol vindaedje del gote el Beldjike, k' a stî metowe en aplicâcion li 28 di setimbe 1919.

Li Iwè djheut k' les vindeus d' peket ni plént vinde ki deus lites d' on plin côn. I dvént fé on passe-avant ås atchteus, po s' i resconterrément les acsiziyins.

C' esteut a càze ki les ptits ovrîs furlént leu paye tot-z atchtant del gote. Il estént adon payîs tos les djoûs. Si n' avént i nén des çances assez po-z atchter deus lites. L' idêye di s' occuper do bouneur des ptîtes djins aveut sourdou après les disduts di 1886.

Come totes les Iwès, elle a stî distournêye. Les botikîs metent on lite di costé, a payî pus tard, mins i dnént on passe-avant po deus lites. Mins nerén, les vindeus d' gote divént todì aveur leus papîs d' accion (vindaedje di deus lites a côn, et stok shuvant) po cwand les acsiziyins vnént.

Li Iwè a stî d' applicâcion diskî diviè 1972.

Dossire aprestêye ås scoles di Bive pa Jacques Dupuis (po Emile Vandervelde), et pa Francis Caramin et Mady Dorchymont (pol Iwè sol vindaedje del gote).

Ôtès racsegnes sol Mimile Vandervelde a l' adresse : http://wa.wikipedia.org/wiki/Emile_Vandervelde

Voyaedjes

Les aiwes di Bath

Cwand dj'a stî sôdård, djasse après l' guere di 1940-1945, nos avans stî evoïs e l' Inglutere. Nosse camp esteut djasse djondant l' veye di Bath.

Bath, c' èst l' pus grande veye do Sud-Ouwess di l' Inglutere, so l' Aiwe d' Avon, dins l' conteye do Sommerset. Gn a la inte cwatru-vint et cint meye djins. Ci fourit l' prumire veye do monde a esse classêye pa l' Unesco.

I n' fât nén rovyî ki l' Ingletere n' a stî evayeye ki deus côps : les tropes da Jules Cezâr et les cenes da Wiyâme li Conkerant ont fwait mî k' les Almands e cwarante.

Do trevén des Romins

Li veye di Bath ("bagn" en anglès) esteut ddja foirt kinoxhowe vla deus meye cénk cints ans a càze di ses sourds di tchôde aiwe ki boutént foû d' tere a cwarante-shijh digrés cintigrades.

E meye nouv cint trinete-cwate, cwand l' Vezuve a bouté foû, l' aiwe du Bath a pierdou ene dijhinne di dgrés tot l' tins d' l' erucion.

Les Romins avént basti a Bath li prumî "spa" (*complexe aquatique*) di l' istwere : bassin d' tchôde aiwe, bassin d' froede aiwe, sôna, bagn trouk, såle di massaedje...

C' estet ene vraiye estacion termâle divant l' lete.

Les schapantès viertus des aiwes minerâles di Bath ont stî bétoit cnowhowes dins l' monde romin. On ï bastixha on forom, kékes timpes, on cinte di comiece, des otels.

I n' dimeure pus asteure ki les " *thermes* " d' où çki l' tchôde aiwe ï court todì. Del vesprêye, cwand l' lumire halkene co etur li djoû et l' nute, gn a ene pitite brouleur k' amonte. C' est foirt bea a vey.

Tins del guere di 40

Tins del guere di 1940, li veye et l' grande eglijhe gotike ont brâmint sofri des bombårdumints des avions almands. Li grande picine est todì la, waire abumême. On n' ï bagne pus, elle est rimpleye di plantes d' aiwe avou des rodjes pexhons ki s' ï pormoennèt.

Les grandès colones rominnes tipikes tot âtoû sont co bén stampêyes et les adjeyantès posteures [*statues*] d' omes et d' sôdårs romins ossu, càzu sins pont di schayteures [*non ébréchées*] màgré l' tins.

Tins del guere, tos les sôdårs etrindjirs ki vizitent estént rçûs pås A.T.S. (femes sôdårs) et priyîs a siner on live e-z ï metant kékes mots so leu vizite.

Dj' ï ans leyî nos emocions sol papî.

L' amirâ Nelson, après ses victweres naivreces, a stî fwait citweyin d' oneur di Bath.

Mimile Petcheur

Cinema

Good Night and Good Luck

Boune nute et boune tchance ! C' esteut come ça kel djournå d' 8 eures al nute atchevéve sol tchinne C.B.S., ezès Stêsses, dins les anêyes 1950.

C' ere vey li cayet avou totès rôzes et totès viyoletes, ca li politike US esteut dins ene des pus noerès termenes di si istwere.

C' ït les trevén do **maccartisse**. Li mårlomé senateur Josef Maccarty, del Wisconsene, aveut fwait vôtter ene lwè po mete a l' awaite tos les fonccionnaires US. Et taper a l' ouxh les cis k' ârént polou tni avou les comunisses.

C' est l' decor do dierin fime da **Georges Clooney**. Li tinme : gn a on gaztî ki saye di mete des xhames el voye del politike do prezidint Truman, k' aveut ene hisse do comunisse.

Kî çki va bén poleur djouwer l' role do senateur Mc Carty ? C' est ci acteur la ki va fé l' succès do fime, sins manke. Udonbén ki lyi va fé fé berwete ! Sapist a Afred Hitchcock, dipus kel metchant est hisdeus, dipus kel fime ârè adiercî s' côn.

Georges Clooney ni fjha ni ene ni deus: li role da Mc Carty serè djouwè... pa Mc Carty lu-minme.

Kimint çoula ?

Tot biesmint tot bastixhant on sinnariou avou mitan des documints istorikes (noer et blanc) et mitan on vraiay fime avou des vraiys acteurs, inte di zels li ci djowe li gaztî, **Daniel Auteuil**.

Muzike

Li pupsak

On "pupsak", c'est èn instrumint d' muzike a vint, avou on saetch di pea pindou après, ene buze po shofler dvins eyet rimpli l'saetch, ey ene ou sacwantès ôtès buzes, ki l'air do saetch endè rexhe sins djoke po produre li muzike.

E walon, li mot "pupsak" est bén cnoxhou dins l' payis d' Mâmdey, Vervî et avârla. I pout eto esse eployî po on grand saetch di pea po mete di l'aiwe, avou ene golete po boere. Anatole Marchal endè djâze dins l' fâve des "cayôs do diale" (li bierdjî d' Mousnî) dins s' live "Å tins des nûtons".

Dins les ôtes lingaedjes, li pupsak si lome "Dudelsack" en almand et "doedelzak" e flamind ("dudelsak" e limbordjwès), "bagpipes" en anglès, "säckpipa" e suwedwès (kécfeye ki ça vînt do walon), "cornemuse" e francès, "biniou" e burton, eyet "gaita" e castiyan.

Discrijhaedje

Les buzes ki produjhnut l'muzike polèt aveur, come po ene flûte, des trôs, k' on pout stoper ou nén, po candjî l' son.

I n' è pout aveur k' ene buze melodike (lomême li chalumo, ou **mwaisse buze**), mins endè pout eto aveur deus, ene po tchaeke mwin (come avou l'"zampogna" itâlyinne, par egzimpe), ou co deus

adjermalêyes, ki les trôs sont stopés pal prumire ou l'deujhinme dognon des doets ("mezzued" tunizyin par egzimpe); dins c' cas les deus buzes sont a pô près les minmes ou avou des combinâjhons d' trôs diferinnes.

Li nombe di buzes a note unike, ou **bourdons**, pout candjî pår, di zero a troes l'pus sovint (nouv côps so dijh a l'octâve ou deus octâves pa dzo l' tonike del buze melodike).

Les pupsaks ont brâmint des cognes, mins les pus cnoxhous sont surmint les grands pupsaks escôswès, ki les redjimints militaires escôswès ont fwait cnoxhe long et lâdje. Insi, cwand les Scôswès deliberént des veyes al guere 1940-1945, i djouwént voltî do pupsak totz i intrant

On les eploye copurade dins les payis gayels (Escôsse, Irlande, Payis d' Wales, Burtaegne) ou avou des raecenes gayeles (Galice), mins eto el resse del France et d' l' Espagne, Bulgâreye, Flande, Tunizeye et, come di djasse, el Walonreye.

On vout ki c' fouxhe l' Impire Romin k' âye sipârdou ces instrumints la.

Sôres di pupsaks

Tchaeke payis, tchaeke môde, dit-st on ! C' est parey avou les pupsaks, k' ont des nos et des cognes ki candjnut d' on payis a l' ôte. Vo-z endè ci sacwants :

- "Biniou kozh" («vî pupsak» e burton). C' est on pupsak tradicionel del Burtaegne, c' est onk des pupsaks avou l' son l'pus hôt, les pus bassès notes do "biniou" sont al minme hôteur ki les pus hôtès notes do grand pupsak escôswès, par egzimpe.

- "Biniou braz" («grand pupsak» e burton). C' est on pupsak eployî el Burtaegne dispoy les anêyes 1950, k' est èn adaptaedje do grand pupsak escôswès.

- "Musosac" ou "Muchafou", pupsak eployî e Hinnot, dins l' coine d' Ate (Arkegnere, Fraine-dilé-Anvegn...) et co pus lon el Flande disk' ås anêyes 1920. Åjourdu, on ndè fwait co a Vervî. Gn a deus bordons et ene mwaisse buze, tertos e si bémol. C' est l' pupsak k' on djouwe co asteure tot costé el Walonreye.

- "Doedelzak" (pupsak e neyerlandès), pupsak tradicionel del Flande; on l' voet dins sacwants tavleas da Brughel.

- "Border pipe" («pupsak del frontire» en anglès), li pupsak tradicionel del Nonne di l' Escôsse.

- "Cabrette", on pupsak di l' Auvergne, el France; avou on bourdon reglé al kinte, ene octâve à dzeu del fondamintâle del buze armonike.

- "Veuze", pupsak des fagnes del Burtaegne et del Vendée.

- "Duda", pupsak di Hongreye.

- "Гаўда" ("gayda"), pupsak del Bulgareye, ki l'saetch est fwait avou del pea d' gade, les bordons eyet mwaisse buze sont metous el plaece des pates eyet do hatrea del biesse.

- "Gaita", pupsak del Galice
- "Grand pupsak escôswès", c'est li pupsak di guere des ârmêyes escôswesses, et did la, des "pipe-band" (ôrkesses di djouweus di pupsaks escôswès).
- "Mezoued", pupsak del Tunizeye.

Rotaedje d' on pupsak

Les diferins bokets d' on pupsak (loukîz l' foto), c'est :

- li mwaisse buze;
- li saetch;
- les stoks di buze (po des pupsaks k'i gn a, on-z a sacwantès mwaisse buzes so on minme sitok);
- li shofla,
- les bourdons;

Li **saetch** est à pus sovint fwait d' pea, avou (à dvins) del hârpixh [poix], po k'i n' piede néen. Mins on pout eto (come c'est l' cas pol "gayda" bulgare) eployî ene vexheye [vessie].

Li **shofla** a-st on ptit clapet po-z espaitchî l' air k'est ddja dins l' saetch di ragoler.

Tos les pupsaks ont pol moens ene mwaisse buze, ki permete di djouwer l' melodeye. L' adire inte deus sôres di pupsaks, c'est l' nombe di bourdons.

À djoû d' ouy, on ndè fwait eto avou des produits sintetikes ou do cawoutchou.

Pablo Sarachaga, a parti des swwaits årtikes di Wikipedia.

Foclore

Li rindjmint des fåves da Aarne et Thompson

Li rindjmint des fåves da Aarne et Thompson, c'est on rlomé sistinme di clasmint des fåves do vî vî tins. C'est l' Finlandès Antti Aarne (1867-1925) et l' Estazunyin, ki provneut d' Suwede Stith Thompson (1885-1976), k' ont-st emantchî ci rindjmint la.

Istwere do rindjmint da Aarne et Thompson

Il a stî eplaidî on prumî côn e 1910 pa Antti Aarne en almand. Li folorisse s'a brâmint rashid so les ramexhnêyes di contes finlandès, so les fåves et floricontes almands das **frés Grimm**, et eto sol schorcêye [recueil] daenwesse da Sven Grundtvig.

E 1927, Stith Thompson a stindou l' rindjmint a des fåves di totavå, dins l' live "The Types of the Folktale : A classification and bibliography", k' a stî replaidî e 1973, pa l' Academia Scientiarum Pennica a Hensilki.

E 2004, Hans-Jörg Uther a co rcandjî ene miete li rindjmint po si *Enzyklopädie des Märchens* (eciclopedeye des fåves do vî vî tins).

Rindjmint da Aarne et Thompson

- fåves di **djâzantès biesses** (inglês : *Animal Tales*, almand *Tiermärchen*). E walon, on-z a, metans, li

fâve do mitan d' Cok, li fâve do dierin leu del Vå, li fâve del gade des bwès di Smu.

- Fâve d' **emacralaedjes** et d' **estchantmint** (inglês : *Tales of Magic*, almand *Zaubermaerchen*). Metans li conte del fêye Meluzene, les spoûles des nûtons. Sacwants fimes ki rexhnut di ces tins cial sont bastis so ces contes la (Harry Potter, li monde di Narniya, Kirikou et les såvaedjès biesses).

- les **fåves rilidjeuses** (inglês : *Religious Tales*, almand *Legendenartige Märchen*); metans : li fâve di l' eraedjî tchesseu di Viêpe, u li rivnaedje so tere då Bon Diu et da Sint Piere; tos les martchîs avou l' Diale.

- les **floricontes** (inglês : *Romantic Tales*, almand *Novellenartige Märchen*); metans Cindrinete.

- les **contes do biesse magneu d' efants** (inglês : *Tales of the Stupid Ogre*, almand *Märchen vom dummen Teufel/Riesen*). E walon, on-z a Canupersil, ramexhné pa Paul Marchot a Sint-Houbert, et l' minme conte, ritrové a Flipveye pa Josée Spinosa

- **Couyonâdes et racontroûles** (inglês *Jokes and Anecdotes*, almand *Schwänke*), metans li fâve do violoneu et do leu, li fâve då Djhan d' Madî

Employaedje et criticaedje

Li rindjmint da Aarne et Thompson a stî eployî po classer les fåves do vî vî tins did pattavå l' Daegn. Et çoula, cobén k' on-z a rprotchî à rindjmint d' esse trop ecorinné so les fåves di l' Urope.

Angelo Comel, rue Malhavez a Huy, écrivain en français et wallonophone

Andjelo Comel, del Måle Schavêye a Hu, sicrijheu e francès et walon-cåzant

Adjâzia moenné pa Lucyin Mahin, li 10 d' octôbe 2005

Li Måle Schavêye di Hu	Bouter po Cocri	
<ul style="list-style-type: none"> - Pocwè ç' no la, li Måle Schavêye, pår kipité e "francès" åresse, "Malhavez" ? - Li pont ki vos avoz passé po-z avni cial, po passer houte di Hoyou, n' egzistéve nén. N'a co asteure ene viye voye ki passe e bwès, sol droete erive. Cwand les djins vnent d' Modåve po ndaler a Hu, et k' Hoyou esteut gros, i n' savént passer a wé, et i dvént dmorer sol droete erive. Did la, dandreus, li lomaedje "li måle schavêye", come vos avos "li måle passe" dins des ôtes viyaedjes. - Et les grandès oujhenes cial astok ? - C'est Deloite et Matthieu (asteure c'est Arcelor, kécfeye bénrade Mital Steel). Å cmince, c'esteut deus viyès famile di Hu, les Delwè et les Godin, k'avént des tolreyes et des papireyes. <p>So tote li vå disk' a Modåve, c'esteut totès oujhenes ki rotént avou l' foice di l' aiwe, des aminwers, des foidjes, evnd.</p> <p>I fhént des toles a tchôd, pu do zéngaedje a tchôd.</p> <p>Al fén, les grossès oujhenes Cockeril, Esperance s' ont rashonné.</p> <p>C'est todi come todi: les gros pexhons ont magnî les ptits.</p>	<ul style="list-style-type: none"> - Et vos, avoz todi bouté a Cocri, ô, vos ? - Awè, edon; al C.M.I. (<i>Cockerill Mecanical Industry</i>). Dji a-st ataké come brigadî, divins les traeceus; pu come alâjheu [<i>alaiseur</i>]; pu al fén, dj'esteu dins les buros d' programmaedje. <p>La, i m' a falou riscoler. Inte 1970 et 1980, na st-avou des machines ki fhént 8 pîces totes les eures estô d' 3 machines ki fhént ene pîce so ene eure. On-z a replaeci ene peclêye di djins adon. Divant, dj' aveu bouté dins ene tchôdroneye a Indji.</p> <p>Après, dj' a stî ovrer e l' Irlande po fé ene cintrâle electrike, a Cork. Dj' ï a dmoré deus ans et dmey avou totes mes djins.</p> <p>Dj' a co travayî dins les tchôdires. Après, dj' esteu supervizeu do montaedjes po les tchôdires di ralouwaedje [<i>de récupération</i>].</p> <p>Pu dj' a rivnou el Walonreye, et bouter po les oujhenes nawearinnes [<i>nucléaires</i>] (Doel, li cintrâle 3 d' Tihindje). Dj' esteu responsâve des moteurs à mazoute di dierin scour (po fé vitmint do corant si totafwait vénreut a toumer e pane).</p> <p>Après, dj' a stî dins l' siervice après-vinte. Cwand on vineut ene tchôdire, aveut</p>	<p>todi èn an d' waeranteye [<i>garantie</i>]. S' i n aveut-st ene aroke, dji dveu aler vey si c'esteut l' veur.</p> <p>Adon, dj' a stî dins tos les payis: e Djapon, e l' Indonezeye, e l' Inde e Pakistan (Islamabad, Karachi, Goudou), Bahrein, Arabeye, Malaizeye, Taylande.</p> <p>End a dju veyou del mizere, lâvå ! Dins l' trintinne di Pakistanès k' estént a Goudou, end aveut k' onk ki saveut lére et scrire. I wangnént 2 dolårs amerikins po fé 12 eures (c'esteut e 1990). Et avou ça Hazan, nosse mandaye, il aveut troes femes. I dmorént dins des càves dins les digues basteyes åd dilong di l' Aiwe d' Indusse. Li plafond do trô esteut sotnou avou des stipes. N' aveut ene poite avou on drap come intrêye. Il aveut haetchî on fi electrike, a pârti del cintrâle.</p> <p>Mi vicâreye</p> <ul style="list-style-type: none"> - Vos n' estoz nén natif del Walonreye? - Nonna ! Dj' a vnou å monde el Bijhe di l' Itâleye. E 1800 et des poyaedjes, mi viyaedje esteut otrichyin. Et m' mame si loméve Monestier - c'est on no francès - Napoleyon ï a stou, et minme des Polonès. C'est dins les Dolomites. Et c'est a kåze d' ene djin d' lâvå, Souzane, ki dj' so cial el Beldjike.

Suzanne de Jeneffe en Condroz

- Kimint s' lome-t i, vosse live ?
- Suzanne de Jeneffe en Condroz
- Wice çoula, Djinefe ?
- C' est on ptit viyaedje dilé Havlindje.
- Et kî k' c' est, cisse djin la ?
- Elle a skepyî e 1919, e l' Itâleye, e plin redjime fachisse. Elle a stî ovrer divins les montinnes disk' a l' âdge di 13 ans. Adonpwis, po wangnî l' crosse del famile, on l' a-st evoyî a Nape come meskene amon des ritches. Et c' est la k' elle a croxhou m' mame.
- Kimint çk' elle aléve a Nape ?
- Ele prindeut l' trin, li voye Belluno-Padowe. Elle ï a stî troes côps troes ans. Adon, nos esténs e 1939, et les Ingles bombårdént Nape. Ça fwait k' ele rivént e s' viyaedje, ki c' esteut on pôvriteus hamtea dins les tienes. N aveut la on tchîf do parti fachisse ki l' a-st evoyî e l' Almagne po bouter. On-z etindeut dire k' e l' Almagne, on n' bombårdéve nén.
- Ces Itâlyins la k' alént e l' Almagne, i n' estént néen prijhnîs, zels ?
- A ç' moumint la, nen. Mins il estént oblidjîs, pa parti fachisse, d' aler travayî, e l' Almagne u e l' Itâleye. Å cminçmint, e 1941, Souzane, elle boutéve el Bavire, ey ele s' i plajheut bén.
- Mins e 1942, ça n' aléve dedja pus si bén. Les Almands ramassént dsu leu narene, des tatouyes el Rûsseye, e l' Afrike do Nôr

(Libeye). Cwand elle a ristî travayî e 1942, ci n' esteut pus el Bavire, mins a Stetin, el Pologne d' ouy.

Ci côn cial, ci n' est ddja pus l' minme afwaire po ndaler å trin. Davance, les ovrîs itâlyins voyaedjént dins des beas vagons. Mins a dater d' 1942, c' esteut des vagons å bisteu.

Il ont stî egadjîs el Pologne - k' aveut stî evayeye e 1939, don, leye -, dins ene cinse ouçk' i n aveut des prijhnîs. I n' estént néen bén lodjîs. I doirmént dins des ståves so des léts onk dizeur l' ôte. Des matrasses di foyes di mayisse, des fayés tenes covtoes. Sol coine des covtoes, n aveut des croes gamêyes, sogne k' on n' les hape.

Cial, i n' magnént k' des crompires, et del tene sope, avou des betrâles et des raecenes.

Et ça fwait k' e 1943, elle a rescontré on prijhnî ki lyi fjheut todi des betchs. C' esteut Djôzef, on sôdård bedje di Djinefe, k' aveut stî prins sol Lisse. Lu, il aveut on tchvå, et i moennéve a l' ansene. I tcheryive ossu å bwès et ås crompires.

Et il ariva, e 1943, k' i s' ont trové eshonnie dins on tchamp. Djôzef diveut ramasser ås fiyaenes [fanès de pommes de terre] et les sintineles almandes dimandît djusse a Souzane di lyi aler dner on côn d' mwin. I plént djâzer, mins djusse di l' ovraedje.

- Et i n' ont néen djâzé fok d' ovraedje et do tins !?

- Bén nonna, don, mins dji n' vos è di nèn dpus, po n' vos néen waster (ni oister) vosse plajhi.

Vî scrijha walon

Li dobe lete LH

Li dobe lete LH, c' est on scrijha k' est ou k' a stî eployî, pa sacwants lingaedjes romans po noter on moyî L.

Les ôrtografeyes do portuguès eyet d' l' occitan l' eployèt co asteure.

Li dobe lete LH e walon

Ci scrijha a-st aparexhou e vî walon diviè 1250.

I pout esse shuvou dins les nos do viyaedje di Pâye, so ban d' Clavir : "Palia", 1179; "Paalhe", 1258; **"Pailhe"**, 1317.

On l' ritrove eto dins des ôtes vîs scrijhaedjes di no d' plaeces, come « **Boëlhé** » (Boye).

I mostere kel shuvion L + Y do hôt-latén a divnou on seu son e walon, li son yod. On l' voet bén dins des mots come « aweye », « botaye », « foye » (latén folia)

Ci candjmint la va fé l' adire inte li walon eyet l' picård, la ki ci shuvion la dene li son L. C' est parey e normand.

Po sacwants mots, la kel shuvion L + Y n' est néen si clair, ci candjmint la ni s' a néen passé dins totes les coines del Walonreye. Insi, po des mots come « sitoèle » (erî-rfwait latén "stella"), « swele », « toele », « (a)rantoele », gn a k' ene pitite coine e l' Basse Årdene k' a des disfondowes avou Y (sutwâye, swâye, twâye, rantwâye).

Li dobe lete LH n' a néen stî reployeye e rfondou walon.

Lives e walon

So l' Anuti

« So l' Anuti », c' est on roman e walon scrit pa **Lorint Hendschel** aviè 1994-1995, et eplaidi e 2005. C' est l' prumî roman scrit e rfondou walon. I serè strimé li 25 di mäss 2006 a l' Aisse dle Tuzance [Centre Culturel] di Bive [Bièvre], avou deus ôtes lives e walon.

Il a rascodou l' pris del Kiminâlté Walonreye-Brussele e 1995.

Li roman est eplaidi avou on ratournaedje e francès, vizon vizu, fwait pa Michèle Gabriel.

Si eplaidaedje, dipus d' dijh ans après si scrijhaedje, a stî adjinçné pal Rantoele.

"So l' Anuti" et li rfondaedje do walon

Dins l' adviertance ås lijheus, Lorint Hendschel est ene miete fotant à dfwait do sistinme di rashiyaedje des accints, li seu sistinme de scrijhaedje do walon accepté pal SLLW å 20inme sieke.

On rtrove li minme idêye cwand li ero, Djustin Colot, trove ki si pa adoptûle, on conte otrichyin, si muchyive dins on laboratwere po scrire des powezeyes e "patwès".

Al loumire do crasset, dji n'a discovrou k' ene pitite plaece avou on tocoe brämint trop ptit po siervi d' for d' alchimisse. Ene axhlete avou sacwants lives: De Arte Compositioonis da Publius Consilius, Bucolicae da Virjile, Les ovraedjes eyet les Djoûs da Ezioide, li

Cantibus Olympiadis Nympharum da Teyocrite (*rimetou en almand pa W. Schrottbar, amon l' imprimeu Lautschrei, Flemsgast, Frankfurt, 1752*)...

Di l' ôte costé: ene tåve, ene tcheyire. Sol tåve: ene pene, on potiket avou on fond d' intche rassetcheye, on moncea d' papîs... Sol prumire pådje, scrit avou des cwârêyès letes gotikes:

Der Sanfte Zefir

Philosophische Gedichte im Mundart vom Züd-Westenteil des Nord-Ostenviertels von Obersdorf

(*Li doûs zuvion*

Arimeas filozofikes e patwès do coulot Sud-Ouwess do cwârtî Nôr-Ess di Somveye)

T' as minti ! Dj' end a rî a schirer m' vinte: insi l' vî sôdård setch come on poy di scoreye si vneut catchî dins ene câve po scrire. Eyet po scrire cwè? Des rimeas, s'i vos plait ! Eyet dins on patwès, eco bén ! A n' nén croere !

Sins balziner, sins ddja taper on côn d' ouy so onk des "Philosophische Gedichte", dj'a tapé les foyeas dins l' tocoe eyet djels a fwait broûler. Tins k' les betchowès blames cotrawént l' papî eyet l' fé tourner a founire, dji riyeu co todi, tot tuzant ki ç' côn ci, li conte Von Altburg esteut moirt eyet ramoirt.

Tant k' a mi, dji esteu deliberé.

Adviertance di l' eplaideu azès lijheus curieus, spepiâds eyet / u sincieus.

Ni cachîz nén après l' viyaedje di Lene so vosse Daegn-Mape : i gn a ddja lontins k' il a tourné a rén.

Tot çou k' on sait, pol djoû d' ouy, c' est k' il esteut kéke pârt e l' Urope, etur des ôtès plaeces lomêyes Escâssene eyet Faimonveye, ene pixheye pus hôt k' Leglijhe u, purade, ene faflote padzo a droete di Djenvå. On-z î càzéve li meye set cint swessante-shijhinme pârlar d' on lingaedje lomé "walon", âdjourdu disparexhou.

Li precieus Atlassé multizoglossike di l' Academeye des Syinces di Buenos-Aires el definit insi: *Una variedad norte-occidental del subgrupo central de los dialectos orientales (sic) del idioma valón, con marcadas influencias meridionales.*

C' est l' vraiay: li scrijheu k' on prezinte si ovraedje vaici n' esteut k' on payizan k' aveut-st aprin a lére - si waire ! Ça fwait k' il a stî eprontre - l' enocin catoize ! - pol moens set mots (set !) à pârlar di Drairi, a céenk kilometes di s' mähhone. A-ton djourmây idêye ! Do côn, li live cial ni våt rén."

Mâgré k' i n' a nole valixhance po les sincieus do lingaedje (ça vout dire: pont d' valixhance do tot), nos l' dinans åzès lijheus come ene pitieuse imâdje di çou ki s' passéve e ç' coine la di l' Urope, eyet dins les

tiesses des djins, dins les anêyes 1700 et des."

Po lére ci vî lingaedje la, li coraedjeus lijheu doet co saveur ki les letes « xh », « jh », « sch », « å », « ae », « oe », « oi », « én » et « ea » ni si scrijhèt nén come ele si prononcént lâvå di ces trevénla. Nos vos avans ddja dit, ciddé padzeu, kimint çk' ele si prononcént e ds ôtès coines d' on payis k' on lomrè « Walonreye », on ptit cint d' anêyes pus tard.

Pol restant, on n' sait nén dtrop comint çki les « endogènes » (c' est insi ki leu goviennint les loméve) prononcént des mots ossi ewaerant ki « afwaire » u - co brâmint pus emacralant - djambe ! ("djombe"?, "djanme"?, "djâbe", "jampe"?).

I nos fâreut, droci, on novea Champollion !

On novea live-bistoke da Paul-Henri Thomsin.

Li walon avå les voyes II

Dji prezinte ås lijheus di vosse gazete tot çou k' i gn a d' meyeu po l' anêye k' atake. Ci serè motoit l' ocâzion po moussî nos sondjes a vrai, et po fé rblawter nosse bea lingaedje walon totavå nosse ptit payis.

Po m' pârt, dj' a ratoké l' feu d' on ptit tchinisse k' aveut restchâfè l' cour des Lidjwès, i n a èn an d' cial. Dj' a ridné, eco ene feye po nel nén rovyî, 10.000 "Li walon avå les voyes (II)", ki les djins ont broké dsu, come di djasse.

Adrovaedje di "So l' Anuti"

Li kèwe di nosse tchèt a bin v'nu !

An 1995, Lorint Hendschel a r'çû l' *Prix en langues régionales de la Communauté française de Belgique* po s' roman So l'anuti èt po onze ôtes contes. Dij ans pus taurd li roman è-st-anfin publîyî.

Li sudjèt, su qwate paroles : nos-èstans au XVIIIyinme siéke. On cinselotî dè payis d' Moûse s'égadje come sôdâr pwis on comte qu'est mambe dè Sint-Ampîre li fêt passer po s' fi. Après oyu fûrlé s't-èritance, noste ome rivint dins s' viyadje po-zî moru. Si p'tit-fi ènn'irè èto, tchessî pa sès djins. C'est li qu'a riscrit l'istwêre a paurti dèfouyas qui s' pârin a lèyî pad'zos s' payasse.

Minme si l' dêrin tchapite anonce li révolucion francèse, li pouvwér dèf rwès èt dèf princes è-st-a s' pus fwârt vêci : li r'lijon sièv a fé choûter lès p'tites djins ; lès Grands èmantchèt lès guères èt l's-ètèrtinu po rachoner leû(s) peûpe(s) padrî zèls èt po s' fé quite dèf-arèdjîs.

Li guêre conte lès Turcs mètans. Nosse mèsse-pèsonadje, Justin Colot, div'nu Justinyin Von Altburg, dwèt aler veûy qwè èt come amon l's-Otomans. One pitite taudje èt i trèvautche li tchamp d' bataye sins mau sin rûse.

Ci siéke-la, c'è-st-ossi l' ci dèf filosofes èt dèf-Anciclopédisses, dèf salons (li ci dèl Barone Vazet-Fudhimplacz), li siéke qu'on-

z-aveut l' dâr dè conèche li francès èt d'è tchôkî dins s' cauzadje come li Prince Von Rohye...

Come di jusse, Justinyin aurè on mèsse di filosofie ; il apidrè l'alemand, li francès èt on pau d'anglès ; i passerè s' temps à lîre dins l' bibiotèque dè comte.

On tûse au Candide da Voltaire (qui l'auteûr li fêt one clignète) mins ossi a William Thackeray (The Luck of Barry Lindon).

Lorint scrît jusse come i cause. Il atoûwe tofèr li lîjeû èt l'éminder padrî li, avou li. C'è-st-on prumî po stitchî dins s' racontadje, a môde di coûts bokèts, sès tûzadjes oudôbin on deûzyinme racontadje. One ôte piceûre, c'est d' conter dins one lète (qui nos fêt rapinser lès *Lettres persanes*). Ni cachîz nin vêci après dèf ratoûrnûres èt dèf comparêzons walones. Li scrîjeû a fwardjî li-minme sès-ostèyes.

So l'anuti, dins l' bon fond, n'est-ç' nin l'istwêre d'one djin qui n' si sét aroutiner a s' planète, on côp qu'elle avise arindjîye po todi ? D'on payizan qui n' sét r'noyî sès rècinéyes ?

Minme s'on n'est nin d'acôrd avou li r'fondu, on n' saureut r'protchî au scrîjeû di n' nin conèche si langue èt di n' s'è soyu siervu. So l'anuti a s' place, one place a paurt, dins nosse littérature.

Asteûre, lîjeû, vos-èstoz a Lène, one sadju inte Astîre èt Dinant. Èt, sins vos k'mander, vos 'nn'iroz, come Justin Colot èt si p'tit-fi. Bon voyadje !

Bernard Louis

Contes di m' payis et d' co pus lon

C'est ene ramechxhêye di noveles da **Jean-Pierre Dumont** eplaideyes på Coirneu e 2005.

I gn a 171 pådjes di tecse, pâr e walon, çou k' endè fwait onk des pus gros live di prôze racontrece e walon di tos les tins.

Li live riprind kåzu tos les sicrijaedjes di l'oteur, di 2001 a 2004, avou "Mignolet" a s' tiesse, on ptit roman k' aveut rascodou l' Pris do Coirneu e 2001.

Gn a des tote pitites et des pus longuès noveles.

Les noveles did "co pus lon", c'est sovint el Hongreye, la kel Djhan-Pire aveut rassonré ene mähone po-z i aler e condjî.

Les enimâdjereures sont fwaitez pa Agnès Closset.

L'ehâyaedje ôrtografike e sistinme Feller a stî fwaite pa Bernard Louis, avou l' aidance da Victor Georges.

Li cwâtron d' noveles a yeu do må di skepyî, a kåze d' on cinsuraedje di sacwants bokets, riwaitîs come trop erotikes.

Les pådjes d' adrovaedje (rimerceymints, divant-z-zouve, adrovaedje, prezintaedje des tecses) sont scrîtes e francès.

L'adviertixhment å lijheu est e walon :

Totes ces istweres cial ni sont k' des carabistouyes k' ont mawri e mähaiti cervea da l' oteur. C'est al vude k' on-z i cwirreut ene ravizance avou des djins moites u evikes.

Sol coviete do cou do live, gn a on prezintaedje do

scrijheu e francès avou s' poitrait.

Les noveles ki s' pasnut foû del Walonreye

- Itzimer : disbâtchance d' ene famile hongwesse souwabe ki rvént e s' payis après ene hapêye passéye e l' Almagne, come "refudjîs".

- Edward Madrell : Complinte pol dierin djâzeu do lingaedje gayel di l' lye di Man.

- Li dierin des Carayibes : li mitan do ptit roman, c' est e l' Amerike, à moumint do disbarcumint des prumîs Espagnols.

- Li ptit souneu d' clokes : Assazinaedje do souneu d' clotche del bâzlike del Nativité a Betleyem, pa des mwaisseus saetcheus à fizik israyelîs e 2002.

- Szenkut : perlinaedje des djupsyins di Hongreye.

- Pate di robete : Istwere d' on gâre-tchesse hongrwès.

- Zoly est mort : Li crapâde do raconteu vike el Hongreye; si ome vént d' mori...

- L'ome ki cöpéve des âbes : disvoyance des Palestinîs crustins so l' ocupâcion d' Israyel.



Eviè Nonne

C'est ene ramechxhêye di noveles da **Lucyin Mahin**, eplaideyes på Muzêye do pårlaedje e l' Årdene, e 2006.

Nouv des dijh noveles si pasnut foû del Walonreye. Elle essinnèt tertotes des persounaedjes marokins u aldjeryins, mins, tenawete, gn a des Walons ki si vnèt stitchî dins les spoûles [récits].

Li live est enimâdjî [illustre] pa des foirt nozêyès pondeures [peintures] da Marie-Louise Mertz, k' a ddja brämint bouté eshonne avou çou ki s' loméve co *Le Musée de la parole au Pays de Bastogne*.

L'adrovaedje a stî scrît pa Pierre Otjacques.

Totes les noveles sont ratournêyes e francès pa ene ekipe di tradujheus, ki c' est : René Georges, Jeanne-Marie Francis, Emile Pêcheur, Willy Leroy, Olivier Esnault, André Demoulin, Jean-Pol Grandmont et Maddy Dorchymont

Divant d' ataker, on-z a droet a on ptit prezintaedje do rfondou walon.

Al fén do live, gn a on motlî de cmons nos, pu onk des nos prôpes, avou les nos etrindjirs. Gn a co sacwantès pådjes di croejhete.

Les scrijhaedjes e walon ont stî rispepyîs del ricoridjrece e rfondou UNIX/Linux adjinçnêye pa Pablo Saratxaga, et del ricoridjrece Microsoft-amistâve, amontêye a parti del prumire pa Francis Baudoux.

Les cis e francès ont stî carwaitîs pa Joël Thiry.